

**MESYUARAT PERTAMA PENGGAL KEDUA  
DEWAN UNDANGAN NEGERI PULAU PINANG  
YANG KELIMA BELAS  
24 MEI 2024**

**PERKARA : 5(B)15**

**SOALAN LISAN OLEH AHLI KAWASAN BERTAM  
YB DATO' SERI REEZAL MERICAN BIN NAINA MERICAN**

15. Apakah jaringan keselamatan sosial yang disediakan oleh Kerajaan Negeri bagi menangani insiden-insiden 'jatuh miskin mengejut' akibat kehilangan sumber pendapatan, kerja dan kematian pencari rezeki tunggal Isi Rumah luar jangka?
- (a) Selain Isi Rumah Miskin dan Miskin Tegar, terdapat juga kategori IR 'Mudah Miskin'. Bagaimana Kerajaan Negeri menangani kelompok rakyat ini?

**YB LIM SIEW KHIM  
MENJAWAB BAGI PIHAK YAB KETUA MENTERI**

15. Jaringan keselamatan sosial yang disediakan oleh Kerajaan Negeri adalah melalui bantuan di bawah seliaan Jabatan Kebajikan Masyarakat (JKM) seperti Tabung Bantuan Segera Negeri (TBSN) dalam bentuk wang tunai secara one-off dengan jumlah maksimum RM500.00. Bantuan ini boleh disalurkan kepada keluarga atau individu yang memerlukan bantuan segera untuk menampung keperluan asas kehidupan harian.

Selain itu, Kerajaan Negeri juga membantu dari segi kewangan melalui skim Bantuan Agenda Ekonomi Saksama (BAES) yang bertujuan untuk meringankan beban sesebuah keluarga yang tidak mampu dan berkeperluan bagi membolehkan mereka meneruskan kelangsungan hidup yang lebih berkualiti.

Pendapatan Per Kapita (PPK) RM260.00 digunakan bagi menentukan kelayakan dan pertimbangan skim BAES. Sekiranya layak, kadar bantuan BAES yang akan dibayar adalah kadar minimum RM100.00 hingga RM1,300.00 maksimum sebulan, mengikut kaedah pengiraan yang ditetapkan di dalam Dasar BAES. Skim ini adalah juga sebagai langkah untuk mengeluarkan mereka daripada kelompok 'Isi Rumah Miskin'.

Untuk makluman, terdapat juga bantuan peruntukan Kementerian Pembangunan Wanita, Keluarga dan Masyarakat (KPWKM) yang dilaksanakan melalui setiap JKM Negeri, termasuk JKM Pulau Pinang yang boleh dipohon mengikut keperluan dan kelayakan, seperti berikut:

- (i) Tabung Bantuan Segera Persekutuan (TBSP);
- (ii) Bantuan Kanak-kanak (BKK);

- (iii) Bantuan Warga Emas (BWE);
- (iv) Elaun Pekerja Orang Kurang Upaya (EPOKU);
- (v) Bantuan OKU Tidak Berupaya Bekerja (BTB);
- (vi) Bantuan Penjagaan OKU Terlantar / Pesakit Kronik Terlantar (BPT);
- (vii) Bantuan Alat Tiruan/Sokongan; dan
- (viii) Bantuan Anak Pelihara (BAP).

Bagi individu yang kehilangan pekerjaan, pihak Kerajaan Negeri Pulau Pinang turut memainkan peranan membantu menerusi Pusat Bantuan Kerjaya dan Bakat Pulau Pinang (Pusat CAT) yang ditubuhkan sejak tahun 2009. Salah satu inisiatif yang dilaksanakan di bawah Pusat CAT adalah kempen “My Penang, My Workplace” yang bertujuan membantu golongan yang hilang pekerjaan dan sumber pendapatan melalui pepadanan jawatan bersesuaian antara pencari kerja dan syarikat majikan.

Selain itu, Kerajaan Negeri turut mempromosikan penggunaan laman MYFutureJobs yang merupakan sebuah portal pekerjaan nasional Malaysia di bawah pengendalian PERKESO. Portal ini

bertujuan untuk menghubungkan pencari kerja dengan majikan secara efisien menggunakan teknologi canggih seperti kecerdasan buatan (AI - Artificial Intelligence) dan algoritma pemadanan. Selain itu, MYFutureJobs juga menyediakan khidmat kaunseling kerjaya, bantuan mobiliti dan perlindungan keselamatan sosial bagi individu yang kehilangan pekerjaan.

Sebagai tambahan, mulai 1 Januari 2018, pihak PERKESO juga telah memperkenalkan Sistem Insurans Pekerjaan (SIP) bagi meringankan beban pekerja yang kehilangan pekerjaan. Sekiranya mereka merupakan pencarum PERKESO dan memenuhi kelayakan, pemohon boleh menerima elaun tunai sebanyak RM 600.00 sebulan bagi tempoh 3 hingga 6 bulan, sementara mencari pekerjaan yang baru.

- (a) eKasih merupakan pangkalan data yang dikendalikan oleh Unit Penyelarasan Pelaksanaan, Jabatan Perdana Menteri (ICU JPM) hanya mengandungi data bagi kategori isi rumah miskin dan miskin tegar sahaja.

Sejak kategori pendapatan mengikut isi rumah B40, M40 dan T20 diperkenalkan, kategori Isi Rumah 'Mudah Miskin' tidak

lagi digunakan Secara umumnya, isi pendapatan kategori adalah seperti berikut:

- (i) T20 - RM 11,820 ke atas
- (ii) M40 - RM 5,250 – RM 11,819
- (iii) B40 - RM 5,249 ke bawah

Terdahulunya, kategori Mudah Miskin golongan yang mempunyai pendapatan melebihi PGK bermaksud threshold di bawah RM1,500.00 bagi kawasan bandar dan RM1,000.00 bagi kawasan luar bandar. Oleh itu, mengikut kategori pendapatan isi rumah, kategori Mudah Miskin dikira dalam kategori B40 (B1) iaitu jumlah pendapatan isi rumah dibawah RM2,560.00.

Bagi membantu golongan di bawah kategori B40, antara langkah proaktif yang diambil oleh pihak Kerajaan Negeri adalah seperti berikut:

- (i) Bantuan kewangan secara bulanan melalui skim BAES;
- (ii) Program Pembaikan Rumah Rakyat Termiskin di bawah Pejabat Daerah dan Tanah untuk membantu menampung kos-kos perbelanjaan atau membaik pulih rumah kediaman;

- (iii) Inisiatif Pendapatan Rakyat (IPR) di bawah Kementerian Ekonomi dengan kerjasama Pihak Berkuasa Tempatan (PBT) pula menawarkan pelbagai latihan dan bimbingan keusahawanan, bantuan modal permulaan perniagaan dan lain-lain;
- (iv) Skim Pinjaman Harapan (SKH) di bawah Perbadanan Pembangunan Pulau Pinang (PDC) ada menyediakan saluran modal tambahan yang mudah dan tidak membebankan peminjam;
- (v) Program i-Sejahtera yang merupakan sumbangan penghargaan dan keprihatinan Kerajaan Negeri Pulau Pinang yang berbentuk kewangan secara setahun sekali kepada rakyat Pulau Pinang iaitu warga emas, orang kurang upaya (OKU), ibu tunggal, suri rumah dan bayi berumur 2 tahun ke bawah.

Program i-Sejahtera yang merupakan sumbangan penghargaan dan keprihatinan Kerajaan Negeri Pulau Pinang yang berbentuk kewangan secara setahun sekali kepada rakyat Pulau Pinang iaitu warga emas, orang kurang upaya (OKU), ibu tunggal, suri rumah dan bayi berumur 2 tahun ke bawah.

Kerajaan Negeri juga menerima baik inisiatif Kerajaan MADANI memperkenalkan Program Sejahtera Komuniti Madani (SejaTi MADANI) yang bertujuan untuk mengupayakan komuniti melalui aktiviti peningkatan sosioekonomi di peringkat komuniti. Program tersebut menawarkan program latihan pekerjaan, kursus celik kewangan dan program pembangunan keusahawanan untuk komuniti setempat.